



Stabsstelle Digitale Verwaltung
Post da stab Administraziun digitala
Unità di gestione Amministrazione digitale

Retschertga tar las vischnancas

Infrastructura dad IT e digitalisaziun da las administraziuns communalas

[Versiun agregada]

25 d'avust 2025

Post da stab Administraziun digitala



Cuntegn

«Il sector da fatschenta Digitalisaziun è ina incumbensa permanenta»	2
1 Finamira da la retschertga da datas.....	3
2 Evaluaziun da la retschertga.....	3
2.1 Stadi da la digitalisaziun en l'administraziun communal.....	4
2.2 Applicaziuns specificas (AS), systems e programs	5
2.3 Archivaziun digitala da lunga durada	11
2.4 Barat da datas cun l'Uffizi da migraziun e da dretg civil (UMDC)	13
2.5 Alarm en cas d'eveniment.....	14
2.6 Sfidas per la transfurmaziun digitala.....	15
2.7 Protecziun da datas e segirezza.....	16
2.8 Collavuraziun e barat.....	18
3 Contact ed ulteriuras infurmaziuns.....	19



«Il sector da fatschenta Digitalisaziun è ina incumbensa permanenta»

Quest citat d'ina vischnanca en il questunari cumprova en moda curta e concisa quai che la retschertga mussa: Il tema digitalisaziun è arrivà definitivamain tar las vischnancas¹. Già la segunda dumonda da la retschertga, quella davart ina strategia da digitalisaziun, dat da pensar. 26 vischnancas han numnadamain formulà ina remartga en chaussa².

Cun 100 vischnancas ch'èn sa participadas, importa la quota da las respostas 100 pertschient³. Questa gronda participaziun cumprova, che l'interess per il tema digitalisaziun en l'administraziun è fitg grond. Nus engraziain cordialmain a tut las collavuraturas ed a tut ils collavurats da las vischnancas per lur participaziun activa: GRAZIA FITG – GRAZIE MILLE – VIELEN DANK!

Cumbain ch'i dat in grond interess, mussa l'evaluaziun ch'il basegn da survegnir sustegn è er grond! Per resumar sa mussan trais champs tematics che han in grond basegn da sustegn: la segirezza dad IT / la strategia da digitalisaziun / l'archivaziun da lunga durada. Sco sfida la pli gronda vesan las vischnancas las resursas persunalas. 90 vischnancas valiteschan la situaziun dal persunal sco ina sfida gronda u mesauna. La valitaziun da las sfidas cumprova ultra da quai en moda impressiunanta, che la tecnica è bain necessaria, n'è dentant betg suffizienta. Perquai che senza in'organisaziun adequata e senza persunas qualifitgadas na fa ella betg effect!

Numerus commentaris espriman il giavisch, ch'il chantun procura per soluziuns e dettia sustegn. A las administraziuns communalas mancan simplamain las resursas per iniziar ina strategia da digitalisaziun, nundir per concepir u per realisar ina tala.

Mo en singulas vischnancas è fin ussa vegnids stgaffids pertschients da plazzas per la digitalisaziun. En bunamain 70 % da las vischnancas èn las chanzlistas ed ils chanzlists responsabels per la digitalisaziun. Per qualifitgar il persunal pon per exempel servir curs, perquai che la furmaziun supplementara da las collavuraturas e dals collavurats vegn resguardada da 72 vischnancas sco sfida. La pratica mussa, ch'il barat tranter las vischnancas è in factur da success essenzial per la transformaziun digitala. Il transfer da savida sistematic promova la derasaziun da proceduras ch'èn sa cumprovadas e sustegna l'unificaziun da process. A medem temp permetta el d'evitar agens svilups intensivs. 87 vischnancas s'interessan per in barat⁴.

Per resumar pon ins constatar, che las vischnancas demussan in cler interess per la transformaziun digitala da l'administraziun. Ellas èn motivadas da far progress e da sa participar activamain a l'ulteriur svilup. A medem temp han ellas in cler basegn da survegnir sustegn, cunzunt areguard la segirezza dad IT, las resursas ed il proceder coordinà. L'avertadad envers soluziuns chantunalas accentuescha il giavisch d'avair a disposiziun in program adequat che distgargia las vischnancas e che augmenta l'effizienz.

¹ Sco menziunà en il questunari vegn la noziun «vischnanca» chapida sco vischnanca politica e cumpiglia er las citads. Quai vala er per questa evaluaziun generala da la retschertga.

² Tenor l'infurmaziun en il questunari, vegnan ils resultats e las remartgas mess a disposiziun a las vischnancas en furma agregada; q.v.d. i na pon vegnir tratgas naginas conclusiuns a singulas vischnancas.

³ Duas vischnancas n'han betg emplenì cumpletamain il questunari.

⁴ Guardar en chaussa [chap.2.8](#); 37 vischnancas s'interessan per in barat, 50 vischnancas eventualmain.



1 Finamira da la retschertga da datas

Sch'i va per la digitalisaziun en las administraziuns publicas, èsi impurtant d'obtegnair ina survista uschè buna sco pussaivel da las structuras e resursas existentas. Tras il Post da stab Administraziun digitala participescha il Departament da finanzas e vischnancas cun questa retschertga activamain las vischnancas a la realisaziun da la Strategia Administraziun digitala Grischun⁵.

Questa retschertga tar las vischnancas ha la finamira da vegnir a savair, cun tge infrastruttura dad IT che las administraziuns communalas lavuran oz e tgenins temas che fatschentan ellas en connex cun la digitalisaziun. Ina gronda part da las dumondas concerna l'infrastruttura dad IT, q.v.d. applicaziuns specificas per la controlla d'abitants, per l'administraziun da finanzas e las differentas soluziuns da software per arcunar, per systems per la pagina d'internet communalas sco er tschertas funcziuns sco p.ex. signatures electronicas.

Pervia da tschertas pretensiuns actualas èn vegnidas integradas en la retschertga dumondas da trais uffizis chantunals; da l'Uffizi da migraziun e da dretg civil, da l'Archiv dal stadi dal Grischun e da l'Uffizi da militar e da protecziun civila.

Ultra d'eruir las sfidas da las administraziuns communalas èsi er fitg impurtant da scuvrir lur basegn da survegnir sustegn pertutgant la segirezza dad IT sco er lur dumondas concernent ina collavuraziun, perquai che quai èn ils elements d'in proceder cooperativ.

Ils resultats n'èn betg mo impurtants per il Post da stab Administraziun digitala e per ulteriurs posts da servetsch. Els èn da grond interess ed han in niz pratic er per las vischnancas, a las qualas els vegnan mess a disposiziun.

A maun da l'evaluaziun po il Post da coordinaziun per vischnancas – domicilià en il Post da stab Administraziun digitala, per stabilir e promover ina collavuraziun tranter l'administraziun chantunala e las vischnancas en il sector da la transfurmaziun digitala – elavurar mesiras e sviluppar (vinavant) pussaivlas purschidas da sustegn chantunals. La retschertga è pia ina basa preziosa per intensivar la collavuraziun tranter l'administraziun chantunala e las vischnancas e per promover ina transfurmaziun digitala cuminaivla sin plaun communal.

2 Evaluaziun da la retschertga

La retschertga era drizzada a las administraziuns communalas, en spezial a la direcziun operativa da quellas, pia a las chanzlistas communalas ed als chanzlists communalas ed ha cumpiglià en tut 27 dumondas.⁶ Las respostas pon ins leger sin las paginas che suondan; ellas figureschan mintgamai ordinadas tenor temas e tenor secturs d'activitad e cumpiglian ina curta resumaziun.


⁵ [Strategia Administraziun digitala chantun Grischun 2024–2028](#)

⁶ Per la retschertga è vegnida utilisada la plattafurma svizra online Findmind.ch, che dat ina gronda pausa a la protecziun da datas ed a la chapaivladad. Las datas vegnan tramessas codadas, vegnan arcunadas en Svizra e na vegnan betg partidas cun terzas personas.



2.1 Stadi da la digitalisaziun en l'administraziun communal


Avais Vus collavuraturas e collavurats ch'èn responsabels per la digitalisaziun en Vossa administraziun?



Da las 39 vischnancas che han inditgà d'avair collavuraturas e collavurats cun ina responsabladad specifica per la digitalisaziun, han remartgà 8, che la chanzlista u il chanzlist communal sez adempleschia questa funcziun.

Respostas da 100 vischnancas (preschentaziun procentuala)

Nua stat Vossa vischnanca areguard ina strategia da digitalisaziun?



Respostas da 100 vischnancas (preschentaziun procentuala)


- Nus avain ina strategia da digitalisaziun u essan londervi d'elavurar ina tala
- Nus avain definì mesiras da digitalisaziun en la planisaziun da la legislatura
- Nus avain in plan da realisaziun concret – cun mesiras definidas, in orizzont da temp e resursas – per projects da digitalisaziun
- Nus na priorisain actualmain betg ina strategia da digitalisaziun
- Nus considerain ina strategia da digitalisaziun en general sco betg necessaria

Questa dumonda pertutga in tema actual, perquai ch'ella ha sveglià il pli grond dumber da remartgas (26) en il questunari: Las vischnancas s'expriman cunzunt en il senn, *ch'ins saja gia pass per pass vi da realisar la digitalisaziun, ch'i manchian las resursas per in plan, ch'i dettia senza auter la necessitad d'avair ina strategia, er considerond che quella saja antiquada, sco ch'ella saja avant maun*. Er las vischnancas che han inditgà, ch'ina strategia da digitalisaziun n'haja betg la prioritad, han remartgà, *ch'ellas na vesian il tema betg sco betg prioritari, mabain ch'autras prioritads hajan la preferenza en lur situaziun actuala*. (Guardar er [chap. 2.6](#)).



2.2 Applicaziuns specificas (AS), systems e programs


Cun tge sistem da controlla d'abitants lavura Vossa vischnanca?



Respostas da 100 vischnancas (preschentaziun procentuala)

Fitg cuntentas⁷ èn 75 % da las vischnancas cun l'applicaziun specifica da HI Soft (Hürlimann Informatik), i suondan ils applitgaders dad innosolv cun 52 %, da GeCoTi Web cun 35 %, da Dialog cun 25 %, e cun ils products dad Axians èn 10 % da las vischnancas fitg cuntentas.

Cun tge software per l'administraziun da finanzas lavura Vossa administraziun?




Respostas da 100 vischnancas (preschentaziun procentuala)

60 % da las vischnancas che lavuran cun HI Soft (Hürlimann Informatik) èn fitg cuntentas cun quella, i suondan GeCoTi Web cun 45 %, Axians Infoma WWSOft cun 25 % e Dialog cun 8 %. Cun las trais autras applicaziuns n'è nagina vischnanca fitg cuntenta.

⁷ En il questunari è adina er vegnida eruida la cuntentientscha cun las soluziuns utilisadas; i pudevan vegnir dadas mintgamai ina fin quatter stailas, dad 1 'malcument/-a' fin 4 'fitg cuntent/-a'.



Tge applicaziun dovra Vossa administraziun per il management da pretensiuns (soluziun d'incasso)?




Respostas da 100 vischnancas (preschentaziun procentuala)

Da las 38 vischnancas che han ina soluziun per l'incasso, utiliseschan 9 pliras applicaziuns specificas (per exempel Abacus per admoniziuns, Collecta per scussiuns).

Las indicaziuns da las vischnancas pertutgant la cuntentientscha cun ils systems na vegn betg inditgada qua, perquai che en cas da cifras totalas pli pitschnas, daventan indicaziuns en pertschients ord resultats casuals resultats confermads da la statistica.

Tge software duvrais Vus per la planisaziun da finanzas?




Respostas da 100 vischnancas (preschentaziun procentuala)

Per las 40 % vischnancas senza ina software specifica per la planisaziun da las finanzas pon ins presumar, ch'ellas lavurian cun Excel, perquai che sut remartgas n'han ellas fatg naginas ulteriuras indicaziuns.




Cun tge program da salari lavurais Vus?



Respostas da 100 vischnancas (preschentaziun procentuala)

Bunamain in quart da las administraziuns communalas utilisescha il program da salari Abacus, 45 % dad ellas èn fitg cuntentas cun quel. 38 % da las vischnancas che utiliseschan Proffix èn fitg cuntentas cun quel. Da las vischnancas che utiliseschan ils products dad Axians Infoma èn quai 11 %, tar las ulteriuras vischnancas na datti nagina che inditgescha d'esser fitg cuntenta cun quels.

Tge sistem d'administraziun da las fatschentas (sistem GEVER) duvrais Vus?




Respostas da 100 vischnancas (preschentaziun procentuala)

52 vischnancas han in sistem GEVER.

La cuntentientscha la pli gronda han cun 33 % quellas vischnancas che utiliseschan eGeKo ubain CMI, i suondan quellas cun Dialog cun 12 %.




Sin tge sistem da content management (CMS) sa basa la pagina d'internet da Vossa vischnanca?



Respostas da 100 vischnancas (preschentaziun procentuala)

Il chanal d'informaziun principal da las administraziuns communalas è anc adina la pagina d'internet, ed uschia a medem temp er in champ da responsabladad permanent.

Po la populaziun s'annunziar sin Vossa pagina d'internet per retrair servetschs communalas?




Respostas da 98 vischnancas (preschentaziun procentuala)

L'administraziun chantunala ha creà il ePortal per l'access da la populaziun e da l'economia als servetschs administrativs; sur quest portal pon en il futur er vegnir connectads servetschs per las vischnancas e servetschs da las autoritads regiunalas. Sche e quantas vischnancas che han gia in agen login è interessant da savair, per evitar structurass parallelas.



Dovra Vossa administraziun signaturas electronicas qualifitgadas?

Ina **signatura electronica** (er: suttascripziun electronica) è ina metoda effizienta e giuridica-main lianta per pudair suttascriber svelt documents digitala. Ina signatura electronica qualifitgada (QES) ha il medem status sco la suttascripziun d'agen maun.



Respostas da 100 vischnancas (preschentaziun procentuala)

Fin ussa lavuran mo 5 % da las administraziuns communalas cun signaturas electronicas. Sche las administraziuns communalas dovran QES, ha quai numerus avantatgs, ma cumpiglia er in pèr sfidas. La basa legala è la Lescha federala CertSE che regla l'utilisaziun da QES. Las vischnancas ston dentant garantir che lur reglaments ed urdens da gestiun interns admettan la signatura digitala – en spezial en connex cun conclus giuridicamain liants.

Tge product dovra Vossa administraziun per signaturas electronicas?

3 da las 5 vischnancas che lavuran cun signaturas electronicas, dovran deesign. Ina vischnanca lavura cun Skribble, ina vischnanca utilisescha SwissID.


Tge documents vegnan signads en moda electronica?

La signaturas electronicas vegnan utilisadas tenor las indicaziuns da las vischnancas per attestaziuns dals servetschs d'abitants e per contracts tenor il Dretg d'obligaziuns. Da las 5 vischnancas che lavuran cun signaturas electronicas, na suttascriba anc nagina vischnanca disposiziuns e decisiuns cun la signatura electronica.



Lavurais Vus cun sigils electronics reglamentads?

Il **sigil electronic** è la versiun electronica dal bul d'ina autoritad u d'ina firma. In sigil electronic reglamentà sa basa sin in certificat electronic ed ha ina gronda forza da cumprova.



Respostas da 99 vischnancas (preschentaziun procentuala)

Per blers process administrativs basta in sigil electronic che na dovra betg ina sutscritpziun persunala – quai po esser relevant per vischnancas pli pitschnas cun resursas limitadas.

Tge product duvrais Vus per sigils electronics reglamentads?

Las trais vischnancas che lavuran cun sigils electronics, dovran tuttas la soluziun deesign.

Tge documents survegnan in sigil electronic?


Qua respundan las trais vischnancas cun las suandantas remartgas:

- *vegn sclerì actualmain en il rom da projects*
- *servetschs d'abitants*
- *quints*



2.3 Archivaziun digitala da lunga durada


Ha Vossa administraziun ina soluziun per l'archivaziun digitala da lunga durada?



Las vischnancas èn obligadas da tegnair en salv duraivlamain lur documents cun valor archivara. L'archivaziun digitala è ina gronda sfida, perquai ch'ils formats digitala ed ils meds d'arcunaziun digitala sa transfurman svelt. Igl è obligatoric da s'acquistar in repository digital. In tal manca anc en bleras vischnancas. Plinavant mancan ulteriuras premissas: resursas persunalas, enconu-schientschas ed in sistem da GEVER cun in sistem da classificaziun.

Respostas da 100 vischnancas (preschentaziun procentuala)

Tge soluziun per l'archivaziun digitala da lunga durada ha Vossa administraziun?




Respostas da 25 vischnancas che sa basan sin las respostas positivas a la dumonda «Ha Vossa administraziun ina soluziun per l'archivaziun digitala da lunga durada?» (dumber da denominaziuns)

Las indicaziuns da las vischnancas davart la cuntentientscha cun ils systems èn plitost dischillusiunantas: tar tut ils systems èsi mo ina minoritad ch'è fitg cuntenta cun els.




Vegn planisada ina soluziun per l'archivaziun digitala da lunga durada?



Respostas da 75 vischnancas che sa basan sin las respostas negativas a la dumonda «Ha Vossa administraziun ina soluziun per l'archivaziun digitala da lunga durada?» (dumber da denominaziuns)

Tar las indicaziuns, ch'ina soluziun vegnia previsiblamain introducida, devi ina dumonda supplementara sin il questunari cun la supplica d'inditgar exactamain il termin – questas indicaziuns concernent las introducziuns divergeschan tranter ils onns 2026 e 2030.

Co duai vegnir organisada l'archivaziun digitala da lunga durada?




Respostas da 100 vischnancas (preschentaziun procentuala)

Questa dumonda commova las vischnancas, perquai che tut en tut hai dà 24 remartgas en chausa: *Ch'i saja difficil da dir, ch'ins saja avert per soluziuns, che questas soluziuns possian er esser regionalas, che la soluziun duaja funcziunar cun il sistem GEVER CMI, resp. GeCoTi Web.*



2.4 Barat da datas cun l'Uffizi da migraziun e da dretg civil (UMDC)



Respostas da 99 vischnancas (preschentaziun procentuala)

Las administraziuns communalas èn obligadas d'annunziar arrivadas e partenzas da persunas da l'exteriur a l'Uffizi da migraziun e da dretg civil (UMDC). En il Sistem d'infurmaziun central davart la migraziun (SIMIC) pon vegnir registradas midadas d'adressas u partenzas. La transmissiun da datas segira capita sur in adapter da secure data exchange (adapter da sedex).

A partir dal schaner 2026 na vegn il UMDC betg pli a porscher ina transmissiun da datas via PCloud per copias da permissiun e da mutaziun incl. taxas. Perquai èsi decisiv che las vischnancas applitgeschian sezzas il servetsch dal register d'abitants dal SIMIC. Da beneventar èsi, che passa 60 % da las vischnancas han access al SIMIC e che passa 3/4 possedan in adapter da sedex. Il servetsch dal register d'abitants dal SIMIC è medemamain en funcziun u previs tar stgars 2/3 da las vischnancas.


Qua èsi tenor il UMDC giavischabel, che quellas vischnancas che na fan anc betg diever d'in servetsch dal register d'abitants, entrian en contact cun il Secretariat da stadi per migraziun (support@sem.admin.ch).



2.5 Alarm en cas d'eveniment

L'alarm da la populaziun è in element impurtant da la protecziun da la populaziun e duai infurmar ed avertir la populaziun davart privels smanatschents sco er intimar ella da reagir. L'alarm vegn ordinà da las autoritads federalas u chantunalas responsablas, tut tenor il gener dal privel e las regions pertutgadas.

Sur tge chanals infurmescha/avertescha Vossa vischnanca la populaziun en cas d'in eveniment?



L'Uffizi da militar e protecziun civila (UMZ) sto garantir en cas d'eveniments sco catastrofes da la natira, interrupziuns da la forza electrica u autras situaziuns da crisa, che la populaziun vegnia infurmada ed avertida svelt, en moda fidada ed en l'entir territori. Igl è pia essenzial d'encouscher ils chanals che vegnan duvrads e lur interacziuns, quai per sustegnair sistematicamain e sviluppar vinavant la strategia d'alarm.

Tar questa dumonda eri pussaivel da dar pliras respostas. Quai è impurtant, perquai che nagina vischnanca n'infurmescha mo sur in unic chanal.



2.6 Sfidas per la transfurmaziun digitala

Nua vesais Vus las sfidas per la transfurmaziun digitala da Vossa administraziun?

Infrastructura da basa IT, hardware unitara per l'administraziun communal (plazza da lavur digitala per lavurar segir ed independentamain dal lieu)

Segirezza dad IT (protecziun da datas, segirezza da las datas e cybersegirezza)


Furmaziun supplementara en l'administraziun (p.ex. curs per collavuraturas e collavuratur)

Elavuraziun d'ina strategia da digitalisaziun

Resursas persunalas

Communicaziun cun e participaziun da la populaziun (plazza communal digitala, app da vischnanca, social media sco Facebook, Instagram e.u.v.)

Digitalisaziun da documents externs (quints da crediturs, dumondas)



Respostas da 99 vischnancas (dumber da denominaziuns)



Las sfidas las pli grondas èn: **Resursas persunalas, segirezza dad IT, elavuraziun d'ina strategia da digitalisaziun.**

Total da las sfidas grondas e mesaunas:

- Resursas persunalas (90,9 %)⁸
- Segirezza dad IT (86,9 %)
- Elavurar strategia da digitalisaziun (78,8%)
- Digitalisaziun da documents externs (74,7 %)
- Furmaziun supplementara (72,7 %)
- Communicaziun e participaziun (61,6 %)
- Infrastructura da basa IT (58,6 %)

La rangaziun da las grondas sfidas:

- Resursas persunalas (64,6 %)
- Segirezza dad IT (53,5 %)
- Elavurar strategia da digitalisaziun (40,4%)
- Communicaziun e participaziun (21,2 %)
- Furmaziun supplementara (19,2 %)
- Digitalisaziun da documents externs (17,2 %)
- Infrastructura da basa IT (10,1 %)


⁸ Questa dumonda han respundì 99 e betg 100 vischnancas. Uschia resulta ina procentuala cun ina plazza suenter la comma.



2.7 Protecziun da datas e segirezza

Davart la segirezza dad IT èn differents aspects vegnids dumandads specificamain per pudair eruir en moda pli concreta il basegn da survegnir sustegn.

Per tgenins dals suandants temas duvrais Vus sustegn en Vossa administraziun?



In cler punct virulent per las vischnancas è il proceder en cas d'ina eventuala cyberattatga, suandà da la protecziun da datas e da la segirezza da las datas.

Total da las sfidas grondas e mesaunas:

- Proceder en cas d'ina cyberattatga (88,9 %)⁹
- Protecziun da datas (61,6 %)
- Segirezza da las datas (59,6 %)
- Arcunaziun da datas (41,4 %)


La rangaziun da las grondas sfidas:

- Proceder en cas d'ina cyberattatga (45,5 %)
- Protecziun da datas (10,1 %), Segirezza da las datas (10,1 %)
- Arcunaziun da datas (3 %)

⁹ Questa dumonda han respundì 99 e betg 100 vischnancas. Uschia resulta ina procentuala cun ina piazza suenter la comma.



Nua gestiunais Vus ils programs d'applicaziun da Vossa cuntrada dad IT (nua èn las datas arcunadas)?




Mintga arcunaziun da datas è cumbinata cun custs e mintga furma ha avantatgs e dischavantatgs. L'arcunaziun locala permetta controlla e sveltezza, entant che l'arcun da Cloud pussibilitescha da scalar e d'acceder da dapertut. Sin in server local han ins la controlla cumplaina, ins dovra dentant savida spezialisada ed ha gronds custs d'acquisiziun e da mantegniment. Cun in partenari dad IT han ins l'assistenza professiunala, incl. segirezza e back-ups; il partenari dad IT cumpiglia ina tscherta dependenza, er concernent la protecziun da datas (nua e co vegnan las datas arcunadas). L'arcunaziun en Cloud è cumbinata cun custs inizials favuraivels, sa lascha scalar fitg bain e garantisce da far actualisaziuns e back-ups automatics. Las malsegirezzas en cas da midadas dal purschider u d'interrupziuns èn qua pli grondas, er la protecziun da datas sto vegnir sclerida bain.

En spezial per datas sensibilas sco il register d'abitants èsi impurtant, che las administraziuns communalas utiliseschian purtaders da datas segirs.



2.8 Collavuraziun e barat


Avais Vus interess per ina collavuraziun cun il chantun en il sector dal login per prestaziuns administrativas digitalas?



Respostas da 98 vischnancas (preschentaziun procentuala)

La collavuraziun tranter il chantun e las vischnancas è d'ina impurtanza decisiva per la transurmaziun digitala en l'administraziun publica, perquai ch'ella è la basa per ina administraziun effizienta, favuraivla per la populaziun e preparada per il futur.

Avais Vus interess d'in barat online davart temas da la digitalisaziun e da best practice (nunliant, ca. 1 ura/mais)?



Respostas da 98 vischnancas (preschentaziun procentuala)

Il barat tranter las vischnancas è impurtant per la transurmaziun digitala, perquai ch'el mussa best-practices e pussibilitescha soluziuns communablas.



3 Contact ed ulteriuras infurmaziuns

Cun la [Strategia Administraziun digitala chantun Grischun 2024–2028](#) vul la Regenza grischuna augmentar la sveltezza per far avanzar cun gronds pass la transfurmaziun digitala da l'administraziun chantunala. Questa strategia cuntegna 13 finamiras e 31 mesiras che sa basan sin questas finamiras. Ina paisa speziala vegn dada a la collavuraziun cun las vischnancas. Quella è numnadamain in factur central per arrivar cun success ad in'administraziun digitala generalmain colliada sin plaun communal e chantunal, quai ch'è dal tuttatafeg en l'interess da la populaziun e da l'economia.

L'administraziun chantunala è londervi d'installar ina infrastruttura da basa segira per il e-government. Quella cumpiglia per exempel il ePortal (eportal.gr.ch), in login uniform, l'identitad electronica e la plattafurma da consegna (chascha da brevs digitala). Questa infrastruttura da basa è amplifitgabila, uschia ch'ella po vegnir duvrada en il futur er da las vischnancas.

Per intensivar la collavuraziun tranter l'administraziun chantunala e las vischnancas vegn installà in post da coordinaziun per las vischnancas. En in emprim pass è vegnidas eruidas las pretensiuns ed ils basegns cuminaivels.

Il Post da coordinaziun per las vischnancas è domicilià tar il Post da stab Administraziun digitala dal Departament da finanzas e vischnancas.

Stabsstelle Digitale Verwaltung
Post da stab Administraziun digitala
Unità di gestione Amministrazione digitale

Anita Capaul, responsabla Post da coordinaziun per vischnancas
tel. +41 81 257 35 61

anita.capaul@dfg.gr.ch

www.digitaleverwaltung.gr.ch